

**Uunga siunnersuut: Inatsisartutlov Qamutit motorillit akileraarutaat pillugit
Inatsisartut inatsisaata allanngortinneqarnera pillugu Inatsisartut inatsisaat nr. xx af
xx. xxx 2019-imeersoq**

*Aningaasaqarnermut Nunanilu Avannarlerni Suleqatigiinnermut Naalakkersuisumit
saqqummiunneqartoq*

aamma

**Uunga siunnersuut: Nioqqutissanik eqqusuinermi akitsuutit pillugit Inatsisartut
inatsisaata allanngortinneqarneranik Inatsisartut inatsisaat nr. xx, xx. xxx 2019-
imeersoq**

*Aningaasaqarnermut Nunanilu Avannarlerni Suleqatigiinnermut Naalakkersuisumit
saqqummiunneqartoq*

pillugit

Aningaasaqarnermut Akileraartarnermullu Ataatsimiititaliap

siunnersuutit aappassaaneerpeqarnerannut

ISUMALIUTISSIISSUTAA

Ataatsimiititaliap suliarinninnermini ilaasortarai:

Inatsisartunut ilaasortaq Hermann Berthelsen, Siumut, siulittaasoq
Inatsisartunut ilaasortaq Peter Olsen, Inuit Ataqtigiit, siulittaasup tullia
Inatsisartunut ilaasortaq Karl-Kristian Kruse, Siumut
Inatsisartunut ilaasortaq Henrik Fleischer, Siumut
Inatsisartunut ilaasortaq Múte B. Egede, Inuit Ataqtigiit
Inatsisartunut ilaasortaq Malene V. Rasmussen, Demokraatit
Inatsisartunut ilaasortaq Jens NapátôK', Partii Naleraq

Siunnersuutit imarisaat siunertaallu

UKA 2019/158

Siunnersuut aqqutigalugu biilit innaallagiartortut aammalu plug-in hybridbiilit motorimut akileraaruserneqassapput tamatumalu peqatigisaanik ATV-t motorimut akileraarutaat 6.554. kr.-init 2.000 kr.-inut ikilineqarlutik. Tamatuma saniatigut motorinut akileraarutip akilernissaanut killiliussaq 20. aprilimit 30. aprilimut aammalu 20. oktoberimit 31. oktoberimut kinguartinneqarpoq.

UKA 2019/159

Siunnersuutikkut sukkunut, sukkulaanut mamakujuttunullu akitsuutit kilomut 5 kr.-inik qaffanneqarput, tubat imigassallu aalakoornartortallit 10 pct.-imik qaffanneqarput kiisalu snescooterinut ATV-nullu akitsuutit 1. januar 2021 aallarnerfigalugu atorunnaarlutik. Tamatuma saniatigut akitsuut nutaaq puussiat 5 literit ataallugit imaqarsinnaasunut puussiamut ataatsimut 2 kr.-iusoq puusianullu anginernut puussiamut ataatsimut 3 kr.-iusoq atuutilersinneqarpoq aammalu akitsuut nutaaq ussasaarutitut naqitanik inoqtigiinnut agguaanneqartussanik eqqussinermut kg.-lumut 5 kr.-iusoq atuutilersinneqarluni. Akitsuutit taaneqartut arlallit ukiorpaalunni iluarsiiiffineqarsimangillat.

Tusarniaaneq

Aningaasanut inatsisissaq pillugu isumaqatigiissuteqarnermut atatillugu suliarineqarnertik pissutigalugu siunnersuutit tusarniaassutigineqarsimangillat. Kiisalu nioqutissat aalajangersimasut akitsuutaasa qaffaatissaattut siunnersuutigineqartut kingunerisinnaavaat nioqutissanik taakkuninnga amerlasuunngorlugit pisiniarneq, tamannalu ilaatigut siunnersuutip iluanaarutaanissaanik annikinnerusumik pinngitsoortitsinnaavoq ilaatigullu peqqinnissaq eqqarsaatigalugu sunniuteqarnerlussinnaalluni. Motorinut akileraarutip allangortinneqarnissaa pillugu siunnersuut Inatsisartut maanna ataatsimiinneranni allamut atatillugu suliarineqareerpoq.

Siunnersuutit aningaasatigut kingunerisassaat

Biilinut innaallagiartortut aammalu plug-in hybridbilit motorinut akileraaruteqartussanngornerat 2020-mi 2,6 mio. kr.-inik, 2021-mi 3,9 mio. kr.-inik, 2022-mi 5,2 mio. kr.-inik 2023-milu 6,5 mio. kr.-inik iluanaaruteqarnerussutaassasoq naatsorsuutigineqarpoq. ATV-t akitsuutaasa appartinnerat iluanaarutissat 2021 aallarnerfigalugu ukiumut 1,5 mio. kr.-inik ikileriarnerannik nassataqartussatut missingerneqarpoq.

Imigassat aalakoornartortalinnik, sukkunik/sukkunit nioqutissianik aammalu tupanik eqqussuinnermut akitsuutinik qaffaaneq kiisalu puussianik plastikinik aammalu ussasaarutinik inoqtigiinnut agguaanneqartartunik nutaamik akitsuusiineq nioqutissanik eqqussuinnermut akitsuutinit iluanaarutit 2020-mi 45,5 mio. kr.-it missaannik amerleriassasut missingerneqarpoq. Ukiut sisamat ingerlaneranni tamakkiisumik iluanaaruteqarneruneq 182,6

mio. kr.-it missaanniissasoq naatsorsuutigineqarpoq. Iluanaarutissat naatsorsornerini nioqputissanik atuinerup appararnissaanik naatsorsuutiginninneq ilanngunneqarsimavoq. Snescooterinut ATV-nullu akitsuutit atorunnaarnerat iluanaarutissanik ukiumut katillugit 6,5 mio.-inik, ukiuni 2021-2013-mi 19,5 mio. kr.-inik naleqartunik, annaasaqarnermik nassataqartussatut missingerneqarpoq.

Ataatsimiititaliap inassuteqaatai

Ataatsimiititaliami ikinnerussuteqartut Inuit Ataqtigiinneersut Partii Naleqqameersullu siunnersuutit pillugit ima oqaaseqarumapput:

Inuinnaat akileraarutitigut akitsuutitigullu minnerpaamik 200 mio. kr.-inik annertunerusumik nammakkernissaat ikinnerussuteqartut akerleraat, siunnersuutimmi marluk taaneqartut akuerineqarnerat taamak kinguneqassammat. Siunnersuutit saqqummiunneqartut pissakinnerusunik equinerussapput. Nassuiaatini paasissutissiissutigineqarpoq inuussutissarsiortut nioqputissanit iluanaarutissaminnik qaffaanissaat ilimanartoq, tamannalu suli sakkortunerusumik equissaaq, tassa akitsuutitigut qaffaatit 200 mio. kr.-it saniatigut. Tamatumani aningaasaqarnikkut pissakinnerpaat aammaarlutik eqqugaanerpaassapput. Tamatuma peqatigisaanik ingerlatseqatigiiffinnut akileraarut appartinniarneqarpoq, tamannalu pingaarnertut pissaqarnerusunut iluaqusiissaaq. Siunnersuutit inuiaqatigiinnut sunniutissaasa tunngaviusumik misissoqqissaarnissaat amigaataasoq ikinnerussuteqartut isumaqarput. Tamatuma saniatigut ingerlatseqatigiiffinnut akileraarummik aningaasalersorneqanngitsumik appaanerup inuiaqatigiinnit akilernerqarnissaa naapertuutinngitsoq ikinnerussuteqartut isumaqarput, kissaatiginerulluguli inuiaqatigiit kaasarfiinit aallernani tamatuma pinngitsoortinneqarnissaa.

Siunnersuutit aqqutigalugit ATV-nik snescooterinillu eqqusuinermut akitsuutit appartinneqarnerat 2021-mi aatsaat pissaaq, taamaattumillu piffissap tamatuma tungaanut taakkuninnga tunisaqarneq unittooratarsinnaavoq, tamannalu inuussutissarsiortunut, tassa maskiinanik taamaattunik tuniniaasunut aammalu taakkuninnga inuussutissarsiumminni atuisunut, pitsaanngitsumik sunniuteqassaaq.

Taamaattumillu siunnersuutit itigartinneqassasut ikinnerussuteqartut inassutigaat.

Ataatsimiititaliami amerlanerussuteqartut Siumumeersut Demokraatineersullu siunnersuutit pillugit ima oqaaseqarumapput:

Siunnersuutit taakku marluk 2020-mi aningaasanut inatsimmi aningaasaliissutissatut pisariaqartitanik matussiipput. Tamatuma saniatigut siunnersuutit peqqinnerulernissamik

siunertaqarput. Taamaalillunilu nioqqutissanik arlalinnik peqqinnermut innarliisinnaasunik, soorlu sukkunik, tupanik imigassamillu aalakoornartortalimmik atuinerup appartinnissaanut siunnersuutit naleqquttutut isigineqarput, tamannalu pitsaasutut isigineqarpoq. Kiisalu amerlanerussuteqartunit maluginiarneqarpoq iluanaarutaanerusussat sinneruttut ingerlatseqatigiiffiit akileraarutaannik appartitsinissamut atorneqalersaartut.

Taamaattumillu siunnersuutit akuerineqassasut amerlanerussuteqartut inassutigaat.


Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuutit aappasaaniigassanngortippaa.



Peter Olsen
Siulittaasup tullia



Hermann Berthelsen
Siulittaasoq




Karl-Kristian Kruse




Henrik Fleischer



Malene V. Rasmussen



Múte Bourup Egede



Jens Napaattoq